

# حالات

شعر

على عبد الرحمن أبو سراج

تقديم

الأستاذ • الدكتور

مصطفى رجب

العلم والإيمان للنشر والتوزيع

البيانات		
شعر حالات		Title - عنوان الكتاب
علي عبد الرحمن أبو سراج		Author - المؤلف
الأولى .		Edition - الطبعة
العلم والإيمان للنشر والتوزيع .		Publisher - الناشر
كفر الشيخ - دسوق - شارع الشركات ميدان المحطة. تليفون : ٠٠٢٠٤٧٢٥٥٠٣٤١ فاكس : ٠٠٢٠٤٧٢٥٦٠٢٨١		Address الناشر
التجليد	مقياس النسخة Size	عدد الصفحات Pag.
--	٢٤,٥ x ١٧,٥	٦٨
الجلال .		Printer - المطبعة
العامة إسكندرية.		Address - عنوان المطبعة
اللغة العربية .		اللغة الأصل
٢٠٠٨ / ٢١٠٠ م		رقم الإيداع
977- 308 -175 - 3		I.S.B.N. الترميم الدولي
2008		Date - تاريخ النشر

## حقوق الطبع والتوزيع محفوظة

تحذير:

يحذر النشر أو النسخ أو التصوير أو الاقتباس بأي شكل

من الأشكال إلا بإذن وموافقة خطية من الناشر

## إهداء

إليه أولا .. وإليه آخرا

وإليه دائما .. أبي .. معلمى

وإلى أمى وأهلى وأسرتى

وأصدقائى

واليكمر ما استطعت

على

## الفهرس

م	الموضوع	الصفحة
١.	تقديم الأستاذ الدكتور مصطفى رجب .....	٥
٢.	مانتجكهاش .....	٧
٣.	مذنب.....	١٣
٤.	القطه السودا .....	٢٠
٥.	خطى يا موت على كل الفقرا.....	٢٦
٦.	متهوم بالعشق.....	٢٩
٧.	إصحى من النوم.....	٣٢
٨.	واخذ على خاطرى منك !! .....	٣٩
٩.	مسألة .....	٤٦
١٠.	أفكار واحده.....	٥٠
١١.	خير..!! .....	٥٣
١٢.	مستنى اموت !!.....	٥٦
١٣.	إنتباهه.....	٦٢

## تقديم

الشاعر علي أبو سراج عضو نادي الأدب بمركز طما - سوهاج واحد من أكثر مبدعي القصيدة العامية تميزا في صعيد مصر، من جيل الشباب ، وقد مثل ناديه في عدد من المؤتمرات والمهرجانات الشعرية المحلية والقومية ، وفاز في عدة مسابقات كبرى بمراكز متقدمة ، وقد استضافته - مع غيره - في أمسيات شعرية بجامعة سوهاج وقي جمعية الثقافة من أجل التنمية بسوهاج فحاز قصب السبق بين نظرائه ، ونال استحسانا وإعجابا كبيرين من الجمهور لما تتميز به طريقة إلقاءه من تمكن وتفنن ،

وقصائد علي أبو سراج - وإن كانت من القصائد قصيرة النفس مشحونة بإحساس عميق ، وصدق فني عال ، تمكن به شاعرنا من أن يحقق لنفسه هذه القدرة التي تفرد بها بين أقرانه على التصوير ، والتقاط المفارقات ، وتكثيف التعبير / وبساطة اللغة مع سلامتها ، وهذا هو سر نجاحه وتألقه .

تحية لعللي أبو سراج ولديوانه الجديد ( حالات )  
وأتمنى له التوفيق الدائم ومزيدا من الإبداع

أ.و. مصطفى رجب

رئيس ناوي اللوب (المرئزي) بمحافظة سوهاج

## ماتحبكهاش

مش طايق نفسي ...

ونفسي اتحرر منها

واعيش درويش ... !!

أواروح

وما اجيش

لا يحوشني طريق

ولا باب ولا شيش !!

يووووه

أما انا ملعون !!

دا انا زي ما اكون

مسئول عن حال الناس

والكون

وباحاسب روجى

وباقسى عليها

وتاهم نفسى بصدق ..

بزور ..

إنى انا غلباوى ..

وسلبى دون !!

وساعات مجنون

والعجز مخلصى ضميرى يثور

يصرخ ويقول .. ما تحبكهاش ..

ما تخايلنيش !!

وانا برضه معاه !!

ماهى أوحش حاجه ..

إنك تهرى دماغك فكر !!

خش الذكر ..

دندن وامشى مع الدراويش  
كل ما تشغل فكرك أكثر  
كل ما قلبك يحزن أكثر  
كل ما يومك يووحش أكثر  
كل ما تكره عيشتك أكثر!!  
من يومى وتاعبانى دماغى ..  
واتألم .. آخذ فى صداغى  
أتكلم ..  
يتقال عدوانى !!  
والاقيهم ..  
قطعوا لى لسانى  
دلوقت خلاص ..  
تتهدى يا دنيا  
ما تتهديش ..

مش ح اشغل بالي  
ما تلزمينيش !!  
غاية ما هناك ..  
نفسى الأحزان ما تحاصرنيش  
ومعاى .. معايش  
أنا اقرقش عيش  
أوحته ملح وجبنه قريش  
أسرح عريان ..  
أتغطى بخيش  
مش مشكل ..  
طول ما اسيادي تعيش  
ما انا باصحى وابات  
شبعان إهانات  
وبكا وتلطيش

مش عايزم الدنيا دهيه

لا ونيس ..

ولا لقمة ..

ولا ميه

ولا حتى الهدمه اللي عليه

وايام وتفوت !!

يا ضمير بيموت

ما تأخذنيش ..

أنا ميت قبلك ..

ما بيديش ..

وسامحني ..

آدى حال الدنيا

معووجه

معووجه وماشيه ..

بعواجه ..

تعملش حساب

غير لخواجه !!

أنا كارهك

وابصم بالعشره

مش عايز من وشك

حاجه !!

( ممداه إلى ولدى إسلام )

## مذنب

أنا شفت فى عينيك اتهام !!

ودبحنى صوتك فى البكا

هدد كيان الروح

وزلزل مهجتى

صبحت

حطام

والحق معاك ..

انما قلبى

مليان بكلام ..

ممکن تسمع ؟!

أنا عارفك

مش ح ترد عليه

ولا حتى ح تفهم منى كلام

انما ... ..

محتاج ارتاح

من إحساس بالذنب

محاصر كل ساعاتى

ومنغص عيشتى ..

وقالقنى ..

ومقلقل راحتى ..

وجنابى طول الليل تتململ ..

ماعرفتش انام

وانت يا ضحكة عمرى

بكل براءة عمرك ..

نايم !!

والفرشه بتاعتك

بتطيطب على بدنك ..

تضحك ..

ف تخليني ابتسم

وابكى ... .. !!

أبكى من خوفى عليك ..

ح تقابل بكرة ازاي؟!

إسلام ..

مش قادر ابص ف وشك ..

التهمه اللى شايفها ف عينك ..

خلتني اشهد لك ..

◆ غلطان ..!!

وعرفت بغلطى وندمان

أنا كنت أنانى وعميان

وجريت ورا نفسى الأماره ..

ف ظلمتك ..

جبتك بالغصب

للدنيا القاسيه الجباره !!

الدنيا اللي بتقفل بابها

ف وش الغلبان

وتسيبه يفرط براها ..

بين حيره ويأس وحرمان ..

أنا آسف ..

وف قلبي مراره

وايامى بطعم الصبار

أنا مجرم ..

إكتب .. واتملى :

( الدنيا رحايه بتتسلى

ع الفقرا وطاحناهم .. غله

كان غرضى ف عيله و ضليله

نتشاقى و نلعب يا حليله

ويا دويك ..

ح نقول ( بسم الله ) ..

الدنيا خدتنا من الضله ..

ورمتنا ف نار )

إسلام ..

لو عايز تنفذ بحياتك ..

وتقضى يومينك بسلام ..

إتعلق باللى يحبوك ..

♦ واستغنى ..

يمكن تدليك

إتعفف ..

واقبض على دينك

وف حلمك ..

خليك معقول !!

إسلام ..

أنا مذنب ..

لكن .. أرجوك ..

إوعاك تلعن فى اللى جابوك

وان مت ابقى اقرا لى الفاتحه

واوعدنى ما تقساش على ابوك

يابنى الله لا يسيئك ..

سامح ..

أنا أذنبت ورايح .. رايح

وح اسيبك ..

مرفوع الراس ..

إتباهى بابوك قدام الناس ..

مذنب ..  
بس ان جيت للجد  
عشت ايام الدفا والبرد  
عمرى ما مديت إيدى لحد  
ولا بصيتش فى حاجة حد ..  
عشت فقير ..  
وما سيبتش عار ..  
عم اسلام ..  
أنا خلصت كلامى معاك ..  
وانت وقلبك !!  
الفقر بيقطعم ظهر اللحم ..  
وانا مهزوم .. مكسور .. منهار ..  
لكن ..  
خايف اخش النار !!

## القطه السوداء

القطه السوداء طالعه ..

بتمزمز في الفيران

والحيه .. لسه حيه

بتولع الغيطان

وتسمم البهايم ..

وتبهدل النسوان

يا عالم ..

إنتبأاااااااااااا ..

الموت عشش علينا ..

والظلم ف منتهاه

سعروا ولاد الذين

طاحوا في بلادنا ..

بيننا ..  
ولا حوق فى اللى جابهم ..  
لا صوم  
ولا .. صلاه !!  
دعوه يا أهل الله  
يارب .. صحينا  
يارب .. نجينا  
قلقان وسنين باهاتى  
والنار بتزيد يوماتى  
يا سيادى ..  
يا ساداتى ..  
ضاقت بينا البيوت  
ضاقت بينا السكك  
والقطة السودا ناويه ..

تدخل كل الديار  
وتزيد النار.. بنار  
وتاكل اللحامى ..  
وتمصص العظامى  
فينك ..

يا ابو قلب حامى  
تعيد لى غنواياتى  
وتخلى النور يواتى ..  
ع النيل ..  
والأهرامات ..

دا القطه السودا جايه  
بتعدل الخرايط  
وتغير المسار  
وتخدر العبايط

وتحكم الحصار  
وانت يا ابو قلب بارد !!  
يا عرة الفرسان ..  
الديا بتستحثك ..  
أنطق ..  
سمعها حسك ..  
عيشه وأخرتها موت  
قاوح ..  
واصمد ..  
وعارض ..  
الحزن .. ظرف عارض  
والفرح أولى بينا  
إنوى وريك معانا  
قوم .. كسر القضبان

وفتح البيبان  
سيفك .. لو كان رهينه  
أيادينا سيوف فى إيدك  
وأيدينا ..  
مش جبانه  
بكفاهه عليك إهانه  
أرجوك .. عشان خاطرها ..  
ما تفرش م الميدان  
القطه السودا .. باننت ..  
ف اعمل حساب م الآن  
عيشه والموت آخرها ..  
ما تموتش بهلوان !!  
وانت يا هاديه ورزينه  
يا مبلية وحزينه

مش عايزك تمشى ليله  
فى سكة الجديان  
القطه بترازينا ..  
واحنا فى الوحل ادينا ..  
متنيلين بنيله .. !!  
مين قال العقل زينه ؟!  
فيه أحسن م الجنان ؟!

## خطى يا موت على كل الفقرا

بنعيب فى الأسياد ..

ونهاتى ..

ما احنا لساننا طويل ..

وفلاتى .. !!

والأسياد مش ممكن تقبل ..

إن عبيدهم تكمش .. تدبل !!

قولوا ورايا ياليلى يا عين

إحنا شوية ناس .. ملاعين

دى الأسياد .. يا عباد .. مساكين

حطوا الخطه وراها الخطه ..

واتبلوا بينا ليوم الدين !!

والأسياد .. مش عارفه تعيش

لاجل دوانا ..

ولاجل العيش !!

دول نايمين ..

قايمين ..

قاعدين ..

على بلاوينا ..

ونطفح ايه !!

واحد ( بيه ) ع الشاشه امبارح ..

قال ( والله كرهت حياتى ) !!..

لوع الحق ..

الحق معاه ..!!

دا احنا يوماتى ..

ما يكفيننا .. طن ( حراتى ) !!

إحنا نموت احسن لاسيادنا

إحنا يارب ارزقنا بجلطه

خلى اسيدانا يارب تعيش

من غير غم .. ومن غير هم ..

هما أحق !!

طبعا احق !!

واحنا نغورم العيشه الزق !!

خطى يا موت على كل الفقرا ..

ما تخليش ع الكوكب .. أجرا ..

إحنا ان متنا تزول الورطه ..

إحنا عيشتنا أساسا .. غلطه !!

## متهوم بالعشق

أنا صوتى اتحش ..

وعضى اتدش

وكل يومين ..

اتخبى ف جلدى ..

واكش .. اكش !!

مش عارف ..

مين قص لى الريش ؟!

ولا فين .. ؟!

ولا شايف ..

غير تنايش ..

على ( بين ) ..

وبقيت بالوقت ..

مهاوود ..

هش ..

متهوم بالعشوق ..

وقول الزور

وقالوا لى :

كسرت ( كباى ) النور

أقولك إيه ..؟!

إخرس ..

ما تقولش ..!!

( أصوات فى العتمه ..

حمول ع القفا

رسومات ع الوش !!

حلفان للبيه ..

يا سعادة البيه ..

التهمة صحيحة وثابته عليه !! )

وبلعت محيط إهانات ..

وخرست

ولعنت أبوكى ف سرى ..

وقعت !!

واربولى الباب

ف حبيت من جنب الحيط

وكفيت ع الحزن !!

( ماجور ) !!

## إصحى من النوم

صلى على اللى ح يشفع فيك

عارفك .. فيك اللى مكفيك

بس اسمعنى الله يعافيك

مصرك.. يا صديق

بتمر بضيق

والوضع مخيف

الوضع فظيخ

خد بايدها وقوم ..

إصحى من النوم

وان قدت بنار..

هيه تطفيك

\*\*\*

كل بلاد الدنيا بتعلى  
وتسلم لولادها الشعلة  
إلا بلادنا ..  
إلا ف مصر !!  
الملاعين ..  
بالعين ميت قصر  
والفقرا ..  
عصروهم .. عصر  
مين فى العالم زى حالاتها  
رخصت واتداست ورداتها  
واتطفى قمرها ونجماتها  
وفلوسها ف كرش المفاجيع  
كدبوا علينا وعلى أهالينا  
لما قالوا لنا الدنيا ربيع

واتفرغوا لليل والبيح

وانت يعزك ..

راح فين عزك ؟

لسه مقفل ع المواضيع ؟!

ريح قلبى ورد عليه

انت يا اخينا

وحد .. صلى الوضع شنيع

طرطق ودنك للمواضيع

لا ح انظر..

ولا اقول كلاكيح

♦ الله يعينك

فتح عينك

واوعى لنفسك ..

إوعى تبيح

ست البلاد ( العربية )

وقعت فى إيد الحراميه

وبإيد عيالها الأغييه

بقيت خلاص ..

لقمه طريقه

والشله وقعت فى ال ( خيه )

ما بقيش فى خاطر نخلاتها

ولا حد بيحلف بحياتها ..

وأفاعى الدنيا الملعونه ..

بلعوها ..

وحلوا ..

وبلعونا ..

\*\*\*

هم يا قاعد على كرسيك

ياللى الهم هاريك وكاويك

إدى الغاليه حبابى عينيك

أنا قلت لك .. ومرسيك

إوعى الأيام لا تقسيك

فقرك حجه عليك ..

مش ليك

عاجبك دا اللى بيحصل فيك؟!

فر.. وسيبك .. م التلاكيك

قول مش بايع ..

واصرخ بيها

قولها .. دى كلمه ..

حياتك فيها ..

ما تفرطش ف حقك ..

عادى ..

واوعى ان رحمت

تروح ع الفاضى

حق ولادك ويا ولادى

يلحقوا شبر ف ديل الوادى

صحصح لاحسن بكره تضيع

قول الكلمه ف وش الغول

قولها معايا ..

وافضل قول ..

قول مش بايع ..

قول ..

عليها ..

واعدل بيها ال ..

مش معدول

قولها رصاصه

ف و ش الساسه

سمع أسوان ..

واسطنبول

## واخذ على خاطري منك !!

قلبك .. ذهب صافى

شواف ..

عفيف ..

دافى ..

مخلوق رائع ..

خرافى ..

ما يوفيكش الكلام ..

واخذ على خاطري منك ..

وانا عارفك ..

غصب عنك

لكن ..

زعلان لإنك

ح تسيبنا للآلام ..

معقول .. خلاص مشيت

طب ذمه ودين ..

رضيت

دا انا لما عرفت ..

جيت ..

أقول .. خليك .. حرام

\*\*\*

يا فرح ماشى .. وسايبنا

للحزن .. يستفرد بينا

عارفينه قدرك ..

ونصيبنا

الدمع يفضل ..

يرازينا ..

بتحبنا ..  
واحنا نحبك ..  
وتحس بينا ..  
وينحسك ..  
ومن الطيابه اللي ف قلبك  
بنغنى دايمآ ..  
على حسك  
يامآ وقفت معانا بجد ..  
بالجدعنه ..  
وبحكمه تهد ..  
مهما يجيلك من أقاويل ..  
بتشوفها بحنيه وود ..  
دايمآ ..  
واقف جنب الحق

صامد ..

جامد ..

واعر ..

صلد ..

قلبك واضح ..

زى الظهر

ما يهملكش لا بير ..

ولا بحر ..

وامتحانات الدنيا الدايمة

بتخوضها ..

وبتقوى عليها ..

تهزمها ..

وتعلم فيها ..

تطلع ناجح ..

وتعديها ..

ما بتمشيش ويا التيار

ممکن ..

تتحرش بالنار .. !!

لاجل العدل

ولاجل الخير

وادی شهايدك ..

حلوه وبيضا ..

إنت ما جيبتش فيها اصفار

والناس أهه ..

♦ جايه تبارك

ويحضن قلبك

تتبارك ..

يارب يا حنين .. بارك

للى يخلى العتمه نهار

وانا جالى اقول ..

ألفين مبروك !!

وادوس على قلبى

عشانك ..

مبروك ..

لكن من ورا قلبى

قلبى اللى موصل

فى حبالك ..

يا والدنا ..

يا أعلى مربى ..

يارب يصلح احوالك

لكن السؤال اللى تاعبنى ..

وأكيد بيخطر على بالك ..

إزای ح تقدر تفارقنا ..

وتفر ..

من حزن عیالك ؟

## مسألة

٥٧

٢٤ ×

—

٢٢٨

١١٤

—

١٣٦٨

ياااااااااا ..ألف ..

تلتميه تمانيه وستين ساعه !!

وما اشوفكيش !؟

معقول ؟

وبيقينا ٦/١٨ .. معقول ؟

مش قايله لى ..

غير الموت ما يحوشنيش عنك ؟

طب إيه ؟

نتيجة الحيط كدابه ؟

ولا انت اللي تعلمت الكذب ؟

أبدا ..

عمرك ما كدبت عليه !!

طب فلبى اللي يحسب غيبتك ..

غلطان ؟

أبدا ..

واحسبها لك ..

أنا آخر مره قابلتك فيها ..

٢٢ أبريل

من يومها ..

وانا حالتى تصعب ع الكافر

فينك ؟

دا انا كنت ح اعادى الدنيا

عشانك ..

وآخذك نضب عن عين الكون

فينك ؟

دا انا دوخت عليكى

وحياة غيبتك عنى ..

لفيت وحفيت

وسألت عليكى ما خليت

حتى اسألى طوب الأرض

محتار وخلص

قربت اتجن

اللى تغيب المده دهيه ..

ما تسألش ..

٥٧ يوم .. ما تبانش

تبقى إيه ؟!

أنا عايزك تشهدى على روحك !

المسألة حلها واضح

وانا قلت لنفسى ..

لازم ماتت

ونويت اقرا الفاتحه عليكى

الفاتحه .....

.....

## أفكار واحده

راجع من شغلك مهود

بتخانق دبان وشك

+ إنك ..

ما نمتش كويس

ليلة امبارح ..

ومعشم نفسك ..

ترتاح فى سريرك للصبح !!

ولقيتها

- بكامل هيئتها -

مستنياك

- واقع م الجوع

صورى الزفت

عربيّات شرطه ودم وإسعاف

وعيال مفزوعه ونسوان

وبيوت ع الارض

إستأّت ..

- الأكل ح يبرد

واقفه لك - بكامل هيئتها -

بتبيّع أخبار!!

مش بيت صابر

إتخانقوا مع بيت فرحات

موضوع ..

ما يعديش بالساهل ..

والبت الغلبانه ام مطوع ..

طلقها الندل

الراجل جاب لك وصل النور

- نفسى تسدت

شيلى الأكل ..

- مش ح تريح ؟

\*\*\*

حاجه غريبه !!

هيه معاك

بتفكر برضه

ف نفس اللحظه

ترتاح فى سريرك ..

للصبح !!

## خير..!!

السنة دى بتمشى .. فعلا ..

وديسمبر ..

بيلم هدومه ..

- كالعاده -

ح اقولك غورى ..

- إلهى ما ترجعى -

ويناير ..

جايب سنته الجايه

وجاى يتنطط

كاوى البفته ما حدش

مالى عينيه

إيه اللى معاه ..

ما اعرفش ..

إنما - كالعاده -

ح اعشم نفسي ..

واقولها .. خير !!

ولوانى ..

- فى قرارة نفسى -

خايف منه بجد

لا مجايه تكون زى قريبه

أو ..

ما يجيبش مجايب .. أصلا

وينزلنى ..

لعاشر أرض !!

والاقتى روحى ..

لما ييجى ديسمير

أقولك غورى ..

- إلهى ما ترجعى -

ويجبنى يناير

تانى أعشم نفسى ..

واقولها .. خير .. !! !!

## مستنى اموت !!

من غير ما حد يموت

ويحكى اللى شافه

مستنى اموت

الدنيا ..

زى اللى تكون

مخلوقه - لناس .. ناس -

إنت - مثلا -

( بلاش )

أنا - مثلا - مش قادر اعيشها

ولا عارف استمتع بحياتى !!

مع إنى باحب الناس والمغنى

ولعب الكوره

وصوت ( عباسط ) ..

وباحب خضار قلب الاطفال

بس الظاهر

- والله أعلم -

كل الحاجات دى

اتغيرت دلوقت !!

إتطفى اللون

والنور

والشمس

وبقيت خل !!

حتى العيد اللى بييجى

م السنه للسنه ..

ما استنيتهاوش ..

غير بس عشان ..

حتة لحمه بتيجى ف صبحيته ثواب

دا انا شكل سنانى نسيته

وطعم الشاى المغلى

وحلقى مرار

ولقيت نفسى

- من غير ما اقصد خالص -

باتسحب بهدووو

وف أبعد ركن ف حيطه الدنيا..

باتفرج !!

ما عرفتش اعلم فيها

- الموت أهون -

يووووه ...

يلعن ابوه الشعر

ان كان شوفنى اكثرم اللازم

وان كان ح يجيب لى الضغط  
من يوم ما بلانى الله بقوالته  
ونازل هتش !!  
إتسرق العمر وأخرتها ..  
صلحت الكون ؟  
طب إيه اللي انا خدته  
من ( قلع صحابه )  
غير حرق الدم !؟  
وحلفت عليه - الله يقيده -  
ولا حوقش معاه حلفان  
ولازق لى  
- زى العمل الردى -  
ما عرفتش افر بجلدى  
مستننى اموت

واتفرج على حال الناس ..  
من فوق  
يمكن ابطال  
أقسى على نفسى  
يمكن بعد العمر دا كله ارتاح  
واقدر اكون اللي ما كنتوش  
واتخلص ..  
من هم الهدمه  
وهم اللقمه  
وان شفت الفقر بعينى  
ارميه بالطوب !!  
واكتشف كل مقالب الدنيا البايخه  
ما الوضع ساعتها ح يتغير  
وح اقول كل اللي ف نفسى

وازعق ..

وارفض ..

واتفلسف ..!!

ما انا إيدى فى الميه البارده

وح اتحجج

بالموت !!

## إنتباه

إصحى ..

ما تهبلش ..

فكر ..

إنتباه !!

إنت بتلاعب كبير

محترف فى مستواه

إوعى تغلط

إوعى .. حاسب

دورنا ماشى لمنتهاه

نقلتین والدورح یخلص

کش ملك .. تعمل إيه ؟

أنا رأیى انك تسلم !

يا ابني أصلام البدايه  
إنت ليه بتلعب معايا  
وانت مش من مستوايا  
يا ابني خلص .. يا للاسلم !!  
فين جيوشك .. ؟  
فين دفاعك .. ؟  
لسه فاكر الدور بتاعك ؟  
بص .. هيه نص ثانيه ..  
يبقى مات !!  
برضه ح تكمل يا بارد .. وتلاعبنى ؟!  
إنت يا حتة بتاع !!  
ياللاسلم ..  
واعتبر الدور دا ضاع  
ياللا يا ابني ..

عندى لعب فى حتة تانيه

ليه تلاعبنى وانت خايف

هيه كشه ..

وانت عارف ..

آدى ااهه ..

مش وعدتك ؟

كش .. مات !!

قوم خلاص الدور ( فنش )

اللى بعده ... !!

مين يا عالم يملا عينى

مين ؟ ..

مافيش ؟ ..

الدماغ دى كمبيوتر

والتخين ما يهمنيش ..

حد له نفس يلاعبنى ؟

إنت ؟ ..

قوم !!

ياللا سلم !!

إوعى تغلط ..

إوعى .. حاسب

دورنا منقول ع الهوا ..

ياللا سلم !!

إنت مش شفت الدمار

همه يا ابنى نقلتين

والملك .. مش محمى خالص !!

ح اغلبك ويد ( نابليون )

خطه مكشوفه وقديمه

بس برضه ح اغلبك

إنت باصص فین یا اخینا

بص – کلتک وزیرک – !!

یاللا سلم

فین عساکرک ..

فین حصانک

وادی طابیه کلتھالک ..

کش ملک ..

یاللا سلم ..

وادی فیل .. وعسکرین

کش تانی ..

بص .. اھه .. مات الملك !!

قوم خلاص .. ح تموت وراه ؟

إنتباه ..

تانی دور برضک ( فنش ) !!

مين عليه الدور يا عالم

مين يا عالم يملا عيني؟

مين .. ؟

يا عالم ... ..

نقلتين والدورح يخلص

ياالله سلم ..

ياالله سلم ..

ياالله سلم ..